

du chirurgien que Je trouué en posture de prisonner de guerre aussi bien que moy, les deux autres Captifs ne se trouuerent pas, parceque Ceux qui les auoient en leur disposition sestoient dispensez pour la chasse & les auoient menéz auec Eux Cest a mon avis ce qui rompit la partie ou qui me sauua pour cette fois la du danger, nous ne somes pas tous assemblez dit un ancien Goiogoen & apres mauoir consideré quelq⁹ tems Il me dit que Je priasse Dieu, Je demanday si cestoit pour mourir & on me dit que non & que Je priasse seulem^t. Dieu a mon ordinaire, Et me leué donc & fis la priere en Iroquoise a fin que tout le monde l'entendit Je noubliay pas de prier en particulier pour tous mes auditeurs. La priere finie on me fit rasseoir a terre, lon me deslia un de mes bras & peu apres on menuoya au Camp des Onneiſts, a peine y fus-Je rendu que plusieurs considerables dentre Eux me vinrent tesmoigner leur Loye de ce que Iestois reuenu Ils auoient eu peur pour moy & me dirent quils nestoient pas participans du Conseil tenu pour mettre entre les mains des Onnontagués, que le Capitaine seul qui mauoit mené auoit fait un coup de sa teste, sans leur en parler que cela narriueroit plus & quon me meneroit a Onneiſts. En Effet des le Lendemain Ils detacherent deux Capitaines auec environ 30 personnes pour m'y Conduire pendant que larmée poursuiuoit sa route vers Montreal.

Dans toutes les Cabanes des Onneiſts Je fus assez bien traité pendant le voyage; Ils me preparent Eux mesmes la natte & sils auoient quelq⁹ chose de bon a manger ils men faisoient part des premiers, mais Ils noublioient pas le soir de me remettre La